

Leames per se tegnir i joegn te Fascia

La Procuradora Cristina Donei à prejentà doi projec ouc ai joegn per i didèr a scola e per schivèr la “fuga di cervelli” fascegn

Joegn - Tel chéder de la deziijn de ge dedicher l'2012 a la formazion dal pont de veduda sozièl, economic, ambientèl e per duta la desvalives clasc de età, enstadi l'è stat rejonà de la lingia de projec pervedu per l'an che vegn e prejentà i prumes doi jà envié via. L' prum, “Ensema amò più bel”, l' se ouc ai joegn de la mesènes; l'auter, “Leames: en rei con tia val” l'è stat pissà per i joegn che fesc e che à fat l'università.

Ensema amò più bel

L' projet “Ensema amò più bel”, prejentà en lunesc ai 28 te la Sorastanza a Poza, l'è nasciù dal Comun generel en colaborazion col Servije Sozièl del CGF, la Scola Ladina e l' Decanat de Fascia, e l' vegn portà dant da la Coprativa sozièla da Trent “Projet92” con senta ence a Clavalets. L'obietif l'è chel potenzièr l' didament ai genitores e ai joegn de noscia val, metan en doura la Lege Provinzièla sul besser de la families. L' projet, a chel che se pel se scrivier ie debant, l' à l' fin de ge meter apede ai joegn de la scola mesènes n sostegn per l'endrez di percors de studie e di doveres che ge vegn dat per cèsa. Se trata de 2 ores en setemèna, fac con Biju e Karin de la Coprativa “Projet92”, te oratorie de Poza e te la scola mesènes de Moena e de Ciampedel, olache i bec pel esser didè tel studie. L' oraries é stac fat aldò del servije publich e ence per ches i genitores che era a la prejentazion, che i à jà fies che à tacà a tor pèrt a la lezioms, ià palasà aprijiamet e sodesfazion per la scomenzadiva, sostegnuda con forza da la Procuradora.

Leames: en rei con tia val

Prejentà en vender ai 2 de dezerember, l' projet l'è dassen inovatif, l' prum de chesta sort no demò te val ma ence tel Trentin e adertura te la Tèlia.

Sia emportanza é stata sotrissèda da la Procuradora Cristina Donei, da la Conseiera de parità Eleonora Stenico, da la professora Claudia Mammari, cognosciuda te Val per la colaborazion con la Scola de Fascia, da la Sorastant Mirella Florian, dal Vizeprocurador Mariano Cloch e dai joegn che à tout pèrt a la scontrèda.



La Conseiera de parità, Eleonora Stenico, la professora Claudia Mammari, e la Procuradora Cristina Donei endèna la prejentazion.

Prejentà apontin da Claudia Mammari, l' projet l' se met dant de investir sui joegn e si talenc. Contra la “fuga di cervelli” da noscia valedes, percheche l'è giust che i joegn vae a studier e fer experiences foradecà, ma l'è giust e fossa bel che i vegne de retorn per porter chiò chel che ià emparà e dèr n contribut inovatif e na crescimonia a duta Fascia.

I obietives metui dant dal projet Leames, che tol ite 825 joegn fascegn, l'è prum de dut che l'joen sie fascina da la possibilitèdes de vita e de lurier de Fascia. Dapò ge vegnarà dat maor lènga tras l' protagonistism di joegn enstesc tel ciamp sozièl, del lurier e culturèl, con n atenzion particolèra per la femenes. L' terz obietif l'è didèr l'joen a cerner sie davegnir universitarie, acioche l' sapie se orienter su la basa de la possibilitèdes de lurier che l'è te Fascia.

Per arjonier ches l'è stat pissà de se mever con n sistem specifich. Donca con n maor dialogh e meisa torones anter joegn, amistradores e operators sozio – economics, e dapò meter ensema na lista de duc i joegn che é jic o che va a l'università, percheche se podesse aer na statistica de sia cernudes e de si enteresc.

Chest l'è l' scomenz de na rei de colaborazion peracenta sul teritorie che, desche duta la Tèlia, l' padesc la “privazion” de si fies, a descapit de la comunanza e ence di joegn enstesc. Eiempies positives del fenomen del “rientro dei cervelli”, ence chiò te Fascia, ne fèsc entener l'emportanza del projet. Te na intervista sun ches sfoi, Fiorenzo Perathoner ne aea dit che sia capazità più grana, che à portà a l'inovazion ti impianc portanont,

la é vegnuda dal fat che l'aea portà te Fascia chel che l'aea vedù e emparà foradecà; e endèna la prejentazion de Leames l'è stat fat l'ejemple de Gianni Rasom da Vich, enegner informaticch chiamà ite da Londra per lurèr per l' Dolomiti Superski.

Endèna la prejentazion l'è stat prejentà doi scomenzadives de valuta outes a la formazion di joegn.

Joegn protagonisc del lurier

Portà dant da Susanna Chiocchetti, referenta tecnica del Pian joegn de zona “La Risola”, l' projet che apontin La Risola metarà a la leta de duc i joegn de Fascia vel fer rejonèr de lurier i joegn, per ge dèr l' met de aer na mior cognosenza e n sostegn te la enrescida del lurier e per l' miorament de sia condizion per chi che à ja n lurier. L' cors pervedit n campus de dotrei dis che didarà i joegn a se cognoscer miec e dò desvalives momenc per tratèr i temes de “autoimprenditorialità” e “business plan” e per scontrèr testamonesc del mond economic te Fascia.

Cors de politica

Prejentà da Teresa Lorenz, l' Cors de politica de la UAL, che à serà sù ai 28 de november sia terza edizion l'è l' soul ejempie te Fascia de formazion politica per i joegn. Portan te val desvalives personages de nonzech del mond del derit, de la politica e de l'economia, ches cors à metù a la leta na ocajon de arricchiment cultural e personèl emportant per entener miec la realtà de duc i dis, de noscia val, del Trentin e del mond. (177)



Ence n muie de joegn à tout pèrt a la scontrèda.